

Hepsimizin Ayozlu Paskellesi kutluca olsun!

Hederlez ayın (may) 5-dä evlerimizä geldi Bük yortumuz – Ayozlu, Pak hem Aydınadıcı Paskellemiz.



Hepsimizin Paskellesi kutluca olsun! Onun Aydın şafkı göklerden nurlan üstümüze insin. Hepsimizä saahlıkan kısmet, bereketlän selemet, uzun ömürlän tatlı laf getirsin! Kurtarıcı hepimiz korusun!

KDUda Halklararası türk kultura simpoziumu

Komrat Devlet Universitetında (KDU) geçti “Halklararası türk kultura, incäzanaatı hem kultura varlın korunması Simpoziumu”.

Bu Simpoziumnda pay aldılar 12 devletän (Azerbaycan, Türkiye, Ukrayna, Uzbekistan h.t.b.) bilim hem kultura insannarı, istoriyacılar, etnograflar hem filologlar.

Lääzim urgulamaa, ani Simpoziumu KDU kableder ikincilää. İlkinkisini kabletti 2016-cı yılda.

“Gagauziyada Hederlez – 2024” ana şennikleri insannarı birleştirdi



Hederlez ayın (may) 6-da gagauzlar baktılar en bük üç milli yortularından birisini – Hederlez yortusunu! Bu yortuyla ilgili şenniklär o günü geçtilär may hepsi küülerimizdä hem kasabalarımızda. Gagauziya Başkankası sa, maamilä surat bu yılık Hederlez Paskellemizin ikinci gününä düştüü için, Gagauziyanın “Gagauziyada Hederlez – 2024” ana şenniklerini Hederlez ayın (may) 11-dä yaptırdı.

Okuyun 4-cü sayfada

Hepsi karıştı: insannıkan insannık, “Enseyiş Günü”nän “Evropa Günü”, Kızıl Askeri hem NATO

9 Mayda bakılan II-ci dünnä cengindä “Enseyiş Günü”nü hem Evropada 8 May günündä kutlanan “Evropa Günü”nü, bireri toplayıp, Moldova kuvetleri bu günneri bilä kutlamaa karar verdilär. Bu iş, neredä sä, insannarı ikiye böldü. Moldova öndercileri 9 May sabaasında etiştirdilär II-ci dünnä cengindä Enseyiş Gününe saygı göstermä hem da taa sora, üülendän, “Evropa Günü”nü da Kişinevün merkez meydanına toplanan insannarın aralarında tantanalı bakmaa.

Okuyun 8-ci sayfada



Konstitütiya sudu: “Sırası geldiynän, bu aalaşmayı inceleyecek!”

Hederlez ayında tamamnadı bir yıl, nicä Gagauziya Başkankası Evgeniya GUȚUL seçildi, angısı, zakona görä, Moldova Pravitelstvosunun azası läüzim olsun, ama Moldova Prezidenti Maya SANDU istämmeer, çünkü eli kalkmazmış, bu uurda Dekreti imzalamaa.



Gagauziya Başkankasının Moldova Pravitelstvosunun azası olması Konstitütiya işi olduu için, Moldova Parlamentının birkaç deputatı konuyulan ilgili Moldova Konstitütiya suduna aalaştılar.

Kendi tarafından Konstitütiya sudu dedi, ani “sırası geldiynän, bu aalaşmayı inceleyecek”.

Şindiyädän saklıdan lekelärdilär hem kırardılar, şindän sora açıktan yıkaceklar

Moldova Pravitelstvonun teklifinä görä, Moldova zakonnarına yapılacak enilenmeklär, angılarına görä erindeki kuvetlär istediü pamätnikleri hem stelaları yıkaceklar. Bu enilenmeklerä görä, herliim “B” kategoriyasında (erindeki kuvetlerin kanadı altında) bulunan pamätniklär “cümne durumunu bozarsalar hem ii görüntüleri uymarsalar” onnarın yıkılmasına yol verilecek.

Diil läüzim falcı hem bilgiç olmaa, ani laf gider Sovet vakıdında küülerdä hem kasabalarda V. Leninä, komunist hem komsomol uurunda hem rus sal-

datlarına koyulan pamätniklär hem da stelalar için, o saldatların ortak mezarların taşları için.

Şindiyädän bu pamätniklär saklıdan lekelenärdilär hem kırardılar. Bu enilenmeklär kabledildiktän sora, onnar artık açıktan darmadaan edilecekler.

Aklınıza getireriz, ani en yakın vakıtlarda 2024-cü yılın Küçük ayında (fevral) Gagauziyanın Kongaz küüyündä kırıldılar V. Leninin pamätniindä Lenin ününü, Çiçek ayın



(aprel) ortasında da Moldovanın Rışkanı kasabasında II-ci dünnä cengindä ölä komsomolcuların pamätniini lekeledilär, orayı “фашисты” yazıp hem faşizma simvolunu resimneyip.

Belli ki, bu barbarlıklarlan ilgili poliitiyacılarda araştırma dosyaları açtılar, ama, söz gelişi, ne şindi, ne dā 15 yılın içindä memlekettä pamätnikleri lekeleyän hem kıran barbar erifleri poliitiya hiç bir zaman bulamadı hem tutamadı.



Herbir küüdä küü toplantıları yapılacak

Gagauziya Başkankası açıkladı, ani, başlayıp Kirez ayından, Gagauziyanın herbir küüyündä küü toplantıları yapılacak.

Canabisi bildiredi, ani küü toplantılarına, kendisindän kaarä, GHT Baş hem Halk Topluşun deputatları katılacaklar.

Toplantıların konusu – vatandaşların 2024 yılın Canavar ayın 20-dän sorası durumu hem beklentileri.

İnsana sormadaan zanaat uçilişçelerini birleştirerlär

Moldova üüredicilik ministerlii açıkladı, ani taa sekiz zanaat uçilişçesini hem kolecını kapadêr. Onnarın arasına düştü Valkaneş zanaat uçilişçesi da, angısını Çadır zanaat uçilişçesinnän birleştirerlär.

Şindi düşünün Valkaneş neredä, Çadır da neredä? Zanaat uçilişçelerindä kim üürener? Belliki fikaaraların uşakları. Bu zor yaşamakta, Çadırdä üürenmök için, o fikaaralardan angı ana-boba uşaklarına Valkaneştän hem dolay küülerdän yol hem üürenmök parası bulacek?

Gagauziya Başkankası açıkladı, ani “bu adimnar zararlıdır. Bu üüredicilik sistemasına urêr, üüredicilerä hem üürencilerä urêr”.



“GagauziyaLand” dinnenmä hem şennenmä parkına genä köstek

2023-cü yılın Canavar ayın (oktâbri) 25-dä Kongaz küüyündä başlıdılan “GagauziyaLand” dinnenmä hem şennenmä parkın yapılması Moldova tarafından kösteklenmää başladı – bu kerä Moldova Milli ekolojiya inspektiyası tarafından.

Nicä belli oldu bu günnerdä, Moldova Milli ekolojiya inspektiyası inkâr gelmiş “GagauziyaLand” dinnenmä hem şennenmä parkın yapılmasının liţenziyasını uzaltmaa. Bu iş köstek

olêr, nicä taa ileri açıklandıydı, bu parkın Kirez ayın (iyün) 1-dä açılmasına.

Çiçek ayın (aprel) 30-da, bu köstâ karşı koymak için, “GagauziyaLand” yapılan erdä insannar protesta çıktılar.



Protestta pay aldılar Gagauziya öndercileri hem erindeki kuvetlerin temsilcileri, Moldova Parlamentın hem Gagauziya Halk Topluşun deputatları, başka kişilär.

Bakmadaan protestlerä, Hederlez ayın 18-dä “GagauziyaLand” dinnenmä hem şennenmä parkın düzülme erinä Moldovanın üç inspektiyasında birdän

kontrolörlar yollanmış. Belli ki, inspektorlar türlü aktlar yapmışlar. Bu kerä yapıcılardan kaarä, onnara mal yollayannara karşı da.

Son haberä görä, Moldovanın TehNadzor slujbası Karar aldı “GagauziyaLand” dinnenmä hem şennenmä parkın yapılmasını kapamaa.

Gagauziya Başkankası Evgeniya GUȚULun işi suda yollandı

Moldovanın antikoruptiya prokuraturası bildirdi, ani başarmış Evgeniya GUȚULa hem zapa altında bulunan “ŞOR” partiyasının ofisin sekretarinä karşı işini da bu uurda dosyeyi suda yollamış.

Bu 68 tomnuk hem 329 sayfalık dosyeya görä Evgeniya GUȚULu hem zapa altında bulunan “ŞOR” partiyasının ofisin sekretarini kabaatlı bulêrlar onda, ani 2019-2022 yıllarında, sistema uurunda, prestupniklär tayfalarından kabledilän hem esaba alınmayan paraları Moldovaya sokmuşlar.

Bundan kaarä Evgeniya GUȚULa kabaat atêrlar onda da, ani zapa altında bulunan “ŞOR” partiyasının kimi erindeki bölümnerinä koordinatıya yapmış.

Gagauziya Halk Topluşu Başı Dimitriy KONSTANTİNOV açıkladı, ani “Başkankaya karşı açılan ceza işi – bu bir düzmä hem yapıntı iş! Bunun uuru – Gagauziya öndercilerini korkutmaa”.

Evgeniya GUȚUL sa bildirdi, ani “ Sandunun emirinä görä prokuratura düşer sade onnarlan, kim kendi memleketindä yaşamayı islää yapêr, insannarın hayırı için çalışêr hem pravitelstvonun kötülüklerinä karşı kalkêr”.



Evgeniya GUȚUL romınca bilmedii için sud ertelendi

Çiçek ayın (aprel) 30-da läüzımdı olsun Gagauziya Başkankasına Evgeniya GUȚULa hem zapa altında bulunan “ŞOR” partiyasının ofisin sekretarinä karşı açılan daavanın ilk oturuşu, ama olmadı, çünkü Evgeniya GUȚUL romınca bilmedii için sud ertelendi.



Evgeniya GUȚULun advokatu Vadim BONARU açıkladı, ani “Evgeniya GUȚULa karşı açılan daavada kabaatların rusça yazılı olmadı için, sudun oturuşu başka günä geçirildi”.

O günü, sud taa başlamadaan, Kişinev Boyukan sudun önündä Gagauziya Başkankasına Evgeniya GUȚULa hem zapa altında bulunan “ŞOR” partiyasının ofisin sekretarin taraftarları protest yaptılar.

GRTyı 60 bin leyä, ATVyı da 40 bin leyä haşladılar – protestlar yardım etmedi, laflar işidilmedi

Çiçek ayın 26-da Moldovanın televidiye hem radio uurunda koordinatıya Sovetinä (Consiliul Audiovizualului), başka televideniye hem radio kanalların arasında, çarıldılar Gagauziya Radio hem Televideniye (GRT) cümne Kompaniyası hem ATV kanalı da.

Moldovanın televidiye hem radio uurunda koordinatıya Sovetin toplantısı çeketmedään bu kuruluşun önündä Gagauziya Radio hem Televideniye (GRT) zaametçilerin hem onnardan yanı insannarın protestı başladı.

Bakmadaan ona, ani “Consiliul Audiovizualului” toplantısında GRTnın direktoru Vasiliy DERMENÇİ danıştı Moldovanın televidiye hem radio uurunda koordinatıya Sovetin azalarına monitoring sonuçlarını or-



tadan kaldırsınar, Canabisini işidän olmadı. Bundan kaarä, esaba alınmadı GRTnın Baş redaktoru Valentina KOROLÄKın urgulaması da, ani Gagauziya Radio hem Televideniye (GRT) cümne Kompaniyası işleer mas-mediyanın çalışmasını kantarlayan Zakona görä.

Sonuç – “dezinformatıya, kin beslemäk hem habercilik güvenniini tutuşturucu nasaatlarını kablettii için” (“pentru admiterea dezinformării, a discursului care incită la ură și nu au asigurat securitate informațională”) GRTya 60 bin leyä, ATVya da 40 bin leyä haşladılar.

Hederlez yortusu 6-daydı, şenniklerini 11-dä yaptılar



Hederlez ayın (may) 6-da gagauzlar baktılar en büyük üç milli yortularından birisini – Hederlez yortusunu! Bu yortuyla ilgili şennikler o günü geçtiler may hepsi küülerimizde hem kasabalarımızda. Gagauziya Başkanlığı sa, maamilä surat bu yılki Hederlez Paskellemizin ikinci gününä düştüü için, Gagauziyanın “Gagauziyada Hederlez – 2024” ana şenniklerini Hederlez ayın (may) 11-dä yaptırdı.

Hicä da herkerä, Gagauziya kultura Upravleniyası tarafından hazırlanan artık 26-cı “Gagauziyada Hederlez – 2024” ana şennikleri Çadır kasabasının “At-prolin” tamazlık at fermasının ipodromunda geçti hem tantanalı bakıldı.

Gagauziya Başkankası Evgeniya GUȚULdan, Türkiye Gagauziya Komrat Başkonsulu Adnan HAYALdan, Rusiya Kişinev Bükelçisi Oleg VASNEȚOVdan kaarä, “Gagauziyada Hederlez – 2024” ana şenniklerinde pay aldılar GHT deputatları, Moldova politikacıları, İspolkom azaları, kultu-

ra, incäzanaat hem sıradan insannar.

“Gagauziyada Hederlez – 2024” ana şenniklerin açılışı kontertlän hem teatrulu gösterisinnän başladı, nedän sora, Hederlezin baş sırası yapıldı – “Gagauziya başkannın kuboo”na “Altın At” at koşuları.

“Gagauziyada Hederlez – 2024” şenniklerinde konterttän hem teatrulu gösteridän kaarä, başka türlü şennikler da yapıldı, el ustaların sergileri hem, belliki, “Gagauz Bulguru” mancası yarışması oldu, neredä pay aldılar Gagauziyanın 15 küüyündän aşçılar hem aşçıyklar.



Gagauziyada “Ana dilimiz” yortusu bakıldı

Çiçek ayın 27-dä Gagauziyada bakıldı “Ana dilimiz” yortusu, angısı halizdän läüzim bakılsın Orak ayın 30-da, çünkü o gündä 1957-ci yılda gagauz yazıcısının Dionis TANASOĞLUNUN kurduu alfavitä görä gagauz yazısı kabiledildi.



“Ana dilimiz” yortusu başladı Çadır kasabasında Ay-Boba Mihail ÇAKİRİN pamätiniä çiçek koyulmasından, zerä bu gün Canabisinin 163-cü duuma günüydü. Nedän sora Gagauziyada “Gagauz dilindä” diktant yazıldı, angısına Gagauziya öndercilerindän kaarä, hepsi kasabalarda 300 kişidän zeedä insan katıldı.

“Ana dilimiz” yortunun baş sıraları geçtilär Türkiye Prezidenti Sayın Recep Tayyip ERDOĞANın Gagauziyaya 2018-ci yılın Canavar ayın 18-dä vizitında izininä görä Türkiye Pravi-

telstvosu tarafından yapılan Komrat stadionunda. Burada gösterilär düzenlendi hem büyük bir konfert yapıldı.

Ayrıca, Gagauziya Başkankası Evgeniya GUŞUL verdi “Mihail Çakir” ordenini filologiya bilgilerindä doktora İvanna BANKOVAYA hem gagauz dilindä hem literaturasında ürediciyalara – Ütülü küüyün Saveliy Ekonomov adına lişeyindän Tamara GROZDEVAYA, Komrat Dimitriy Karaçoban

adına lişeyindän Ekaterina KILÇIKA, Komrat Mihail Çakir adına koleciından Galina SİRKELEYä hem Kıpçak küüyün Boris Yanakoglo adına lişeyindän Lidiya ÜSÜMBELİYA.

Hep bu günü ödül verdilər Gagauziya kultura Upravleniyası tarafından yapılan “Ana Dili – kulturenin ruhu” aktyada enseyennerä dä: Aydar, Beşalma, Kiriyyet, Komrat hem Kongaz kultura evlerinä; Baurçu, Beşalma, Kongaz, Tomay küü bibliotekalarına hem dä Gagauziya Pötr Draganov adına merkez bibliotekasına.



Gagauz literaturasına taazä kan – Kristina KOÇAN

Çiçek ayında “Pontos” basım evindä tipardan çıktı genç gagauz poetasının Kristina KOÇANın literatürä dünnäasında ilk kiyadı “Seslä, canım...”, angısında toplu gagauz dilindä yaratmaqları, rus dilinä hem rus dilindän çevirmelär.

Kristina KOÇANın “Seslä, canım...” kiyadının prezentaşyası oldu Komrat Pötr Draganov adına Regional bibliotekasında, nereyi toplandılar poetasının yakınnarı, geldilər anasıbobası – Tatyana hem İvan KOÇAN, dädusu hem malisi – İvan Petroviç hem Anastasiya Petrovna BOGDAN, literatürä uurunda zaametçilär, bibliotekacılar, muzeycilär hem başka kulture insannarı.

Kiyadın hazırlanması hem dünneyä gelmesi için annadarak, Kristina KOÇAN şükür etti akademik hem yazıcıya Todur ZANETä nasaatlar hem yardım için hem hepsi insannara, ani havezlän yardım ettilär laflan, jestlän, işlän, duaylan bu kiyat dünneyä görsün deyni.

Ondan sora avtoru kutladılar Komrat Pötr Draganov adına Regional di-

rektoru Mariya NEDÄLKOVA, Gagauziya kultura Upravleniyasının başı Marina SEMENOVA, ATATÜRK türk bibliotekasının direktoru Vasilisa TANASOĞLU, kiyadın redaktoru Todur MARİNOĞLU hem başkaları.

Läüzim urgulamaa, ani bu kiyada girän Kristina KOÇANın peetlerini pek gözäl rus dilinä çevirmiş Rusiyanın Ufa kasabasından yazıcıyca Kristina ANDRIANOVA-KNİGA.

Not. Koçan KRİSTİNA duudu Beşalma küüyündä 1991-ci yılda, Baba Marta ayın 1-dä. Onbir yaşındaykan, aylesinnän bilä, Komrat kasabasına geçti. Komratta üürendi D. Karaçoban adına teoretik lişeyindä, D. Savastin adına resim şkolasını bitirdi. Moldova Devlet Agrar universitetin ekonomika fakultetini ba-

şardı. Meraklanër incäzanaatlan – yazër peet hem beener resimmemä.

Çalıştı “Hakikatın sesi” gazeta için, yardım etti Bibliya tekstlarını gagauz dilinä çevirmemä. Peetleri “Oğuz sesi”, “Sabaa yıldızı” jurnallarında, “Ana Sözü”, “Hakikatın sesi” gazetalarda tiparlandı. Annatmaları “Hakikatçıların sesi” toplumunda, “Ayna” hem “Gagauz yazıcılar birlii” jurnallarında tiparlandı. Peetleri çevirildi rus dilinä 2021 yılda da çıktı rus jurnallarında «Батандаш», «Бельские просторы», «Веретено».

“Akademiya Rumeli” proektında (Edirne, 2014 yıl), Türkiyada ilk Türk dünnäası Genç yazıcıların buluşmasında (İstanbul, 2017 yıl) pay aldı. “Meras” proza yarışmasında



aldı ikinci erin ödülünü (2015 yıl). Gagauziyanın 20-ci yıldönümünü peet yarışmasında “Yaşasın halkım” peeti üçüncü eri aldı (2014 yıl).



Diil sade Gagagauz Yerindä, ama Moldovanın rayonnarında da gençlär bilerlär ne yortuyu kutlêr Türkiye Hederlez ayın 19-da

Hederlez ayın (may) 19-da, Türkiyedä, Türkiye Respublikasının kurucusunu Mustafa Kemal ATATÜRKü anma, Gençlik hem sport Günü yortusu bakılêr. Bu yortuylan ilgili olarak hem bu yortuya adanan, artık bir adetä dönän, Komrat ATATÜRK bibliotekasında şahmata turniri yapılêr. Bu yıl 18-si oldu.

105 yıl geeri, bu gündä, Türkiyenin kurucusu Mustafa Kemal ATATÜRK danışmış gençlerä vatani yabancı düşmannardan kurtarmaa kalksınar. Halkın gelecää gençlerin elindäymiş. Bu danışmak gençlerdä vatan sevgisi duygusunu uyandırmış. Onaltı yaşında olannar da, anadan-bobadan ayırılıp, devletini kurtamaa kalkmışlar, gösterip ani bu halkın gelecää var. Onuştan Türkiyedä bu gün gençlerä başlanmış, taa sora da Mustafa Kemal ATATAÜR-Kü anmak günü nişannanmış.

Bu gün diil sade Türkiyedä, ama başka türk devletlerindä da kutlanêr. Bu kutlamaklarla başka halklar kendi büyük saygısını ATATÜRKä, Türkiyä Respublikasına gösteriler.

Maasuz bu günä adanmış, 18 yıl sıravardı Komrat ATATÜRK biblioteka-

sında şahmata turniri yapılar. Bu yılların içindä bizim turnirimiz pek dişti hem genişlendi hem da taa üsek uura çıktı.

İlk yıllar 15-20 kişiyän, Komrat şkolaların uşaklarınan gecärdi turnirimiz. Baasılarımız da kuvedimizä göräydilar: kalem, teftir, küçük kiyat-çıklar.

Büünkü gündä bizim katılannarımız diil sade Komrattan, ama Gagauz Yerin başka dolaylarından da, Basarabka hem Kauldan rayonnarından, Kişinevdan oldular. Çoyu gençlerin var razırları (sportta masterlää kandidat, halklararası uurunda reytinglar). Çoyu onnar katıldılar Moldova Çempionatına, neredä aldılar I-ci, II-ci erleri, da kazandılar hak pay almaa Evropa hem Dünnä çempionatlarında. Bu başarılarda bizim “Şahmata okulumu-

zun” da katkısı var. Bu gençlerin çoyu gellerlär uroklara, angıları geçer bizim bibliotekamızda.

İsteerim sölamää, ani ödüllerimiz da pek dişti. Bünkü gündä halizdän gözäl hem paalı baasıları kablederlär diil sade onnar, kim birinci, ikinci, üçüncü erleri aldılar. Bizim var “Çok çalışan”, “En küçük katılımcımız” hem başka da ödüllerimiz. Bu yılın en küçük katılımcımız 5 yaşında olan bir kızcaazdı. Bakmayarak ona, ani yaşı küçük, onun bilgileri etti taa büyük yaşta olan uşaklarla yarışmaa. Turnirimizä katılmaa isteyennär pek çok var, ama büünkü gündä kolayımız bukadar. Ödüllerdän kaare, hepsi uşaklara “Katılım belgesi” verildi hem gözäl ikramnar yapıldı.

Lääzim urgulamaa, ani turnirin bü-



tün para harçlarını üstünä aldı Türkiyenin Yunus Emre İnstitutu.

Bizim yotrumuzda bulundu Komrat Başkonsulun yardımcısı Süreyya GÜLVER, Türkiyedän KDUDA çalışan üüredicilerimiz, Türkiyedän gelän muşafirlerimiz, turnirda pay alan uşakların anaları-bobaları. Bibliotekamızın başçası insannan doluydu. Gelän-geçenin da vardı kolayı, burayı uurrayıp, gözäl oyunara baksınar.

Çok saa olsunar bizim trenerlarımız, angıları sırasınca geçirdilär bu turniri.

İleriyä neetimizdä var taa da üsek uura çıkarmaa bu turniri. Katılannar olsun diil sade Moldovadan, ama başka devletlärden da. Açan bir iş gözäl olêr, onu isteersin taa da gözäl yapmaa.

Şükür Allaha da, bizä yardımcı oldu – gözäl, güneşli bir hava bu günkü kurdu.

Vasilisa TANASOGLU, Komrat ATATÜRK bibliotekasının direktoru



Küülerimizin hem Kliselerin Kurbannarı şenniklän bakıldı

Hederlez ayın 6-dä Gagauziyanın Beşalma, Bucak, Kazayak hem Karbalı, Hederlez ayın 22-dä dä artık Baurçu, Kiriyet hem Kongazçık küüleri Kurbannarını baktılar.

Beşalma, Bucak, Kazayak, Karbalı, Baurçu, Kiriyet hem Kongazçık küülerin hem Kliselerin Kurban günündä buradaki kliselerdä slujbalar yapıldı, insannar komkalarını aldılar hem kliseleri kruçalarla döndülär.

Ayrıca şenniklär dä oldu, güreş, “Kuran” oyunu hem başka sport yarışmaları yapıldı, uşaklara tatlılık verildi hem konçertär gösterildi.

Küülerin bu yortularında Gagauziyanın öndercileri bulundular hem küülülärä baasılar daattılar. Bundan kaarä, Canabileri küülülärlän hem küülerin o günkü muşafirlerinnän barabar, horu yaptılar hem başka oyunlar oynadılar.

İnsannara da şenniklär anılmış artistlerin konçertlerinnän hem feyerverklarla başarıldılar.



Sportsmennar hem sportsmenkalar kendilerini gösterdilər: Moldovadan, Evropadan, Dünnäädän 213 medali!

Hederlez ayın (may) 14-dä Komrat Kultura evindä, geçteki sport sezonda başarıları için, Gagauziya sportsmennarını, sportsmenkalarını hem onnarın trenerlarını kutladılar hem ödülledilər.

Bu kutlamak sırasında, Gagauziya sportsmennarından, sportsmenkalarından hem onnarın trenerlarından kaarä, pay aldılar Gagauziyanın başka anılmış insannarı da, angıları Gagauziya Başkankası Evgeniya GUȚULLan hem Gagauziya Halk Topluşu Başı Dimitriy KONSTANTİNOVlan barabar, sportçularımıza ödülleri verdilər.

Geçän sport sezonda Gagauziya sportsmennarı hem sportsmenkaları çeşitli Dünnäa, Evropa hem Respublikadaki yarışmalarda 213 altın, gümüş hem bronza medalilärlän bizi

sevindirdilər hem Gagauziyanın bayraamı üüseklää kaldırdılar.

Moldova Respublikası çempionatlarında:

51 altın medali;
55 gümüş medali;
90 bronza medali.

Evropa çempionatlarında:

2 altın medali;
5 gümüş medali;
3 bronza medali.

Dünnäa çempionatlarında:

4 altın medali;
3 gümüş medali.



Meñenelardan kimi pensionerlara para yardımını zapa altında

Komrat Apelätiya sudun kararına görä, Gagauziya İspolkomun "Kimi pensionerlar kategoriyasına edek para yardımını için" 2023-cü yılın Kasımın 3-dän kararı zakona karşı gidän tanıdı hem zapa altına aldı.



Hederlez ayın (may) 15-dä Komrat Apelätiya sudun tarafından alınan karara görä: "Komrat Devlet kañteläriyası tarafından "Kimi pensionerlar kategoriyasına edek para yardımını için" 2023-cü yılın Kasımın 3-dän No. 22/2 temelleştirmä kararını Administrațiya iskınu kabletmää hem o kararı zakona karşı gidän tanımaa hem zapa altına almaa".

Zakona görä, iki ayın içindä var nicä, Komrat Apelätiya sudun kararını ortadan kaldıрмаa deyni, Moldovanın Üüsek daava Palatasına danışmaa.

Gagauziyada taa bir festival! Bu kerä – "Halkların dostluk festivali"

Hederlez ayın (may) 18-dä, Gagauziya Başkankasının çalışmasınan, Komrat'ta seftä oldu "Halkların dostluk festivali", nereyi, Gagauziyada yaşayan türlü halklardan kaarä, buyur edildilər Moldovada Belarusiya, Kazahstan, Kirgistan, Rusiya hem Armeniya diaspora derneklerindän insannar da.

Gagauziyada "Halkların dostluk festivali"ndä, Gagauziya öndercilerinin hem kimi zapa altında bulunan partiyaların temsilcilerinin nasaatlarından sora, şenniklär başladı.

Koñtert, oyunнар, imeklär arasında uşaklara da ouyncaklar kuruldu.

Hep ölä festivallär hem hep o gündä geçtilär Moldovanın Orhey, Taraklı, Belț kasabalarında da.



Ankarada “Ukrayna gagauzların kultura günü”

“Ukrayna gagauzların kultura günü”ndä açılış sözlerinnän nasaat ettilär Ukrayna Ankara Büükelçisi Vasıl BODNAR hem TİKA Başkan Yardımcısı Dr. Mahmut ÇEVİK.

Dr. Mahmut ÇEVİK urguladı: “Halizdän, Çiçek ayın 27-dä gagauzların istoriyasında önemni bir gün – gagauzların dilinä izmet edän Mihail ÇAKİRin duuma günü. Biz dä, bu

Çiçek ayın 27-dä, Ukrayna Ankara Büükelçilii zaametinnän hem Türk İşbirlii hem Koordinatıya Agenstvosunnan (TİKA) hem da Ukrayna gagauzlar Birlii dernäännän ortaklunnän, Ankarada geçti “Ukrayna gagauzların kultura günü”.

büük adama saygı göstererek, gagauz soydaşlarımıza hem moldovalı insanlara deyni Kişinevdä bulunan Mihail ÇAKİRin bibliotekasına eniletmäk yaptık. Bundan kaarä Gagauz Yerindä

yaşayan gagauzlara, Ukrayanada gagauzlara, krım tatarlarına hem meshetin türklerine TİKA 600-zä yakın proekt ömürä geçirdi”.

“Ukrayna gagauzların kultura

günü” çerçevesindä, sırada gagauz kulturaşınan ilgili hem resim sergileri yapıldı, gagauz milli imeklerindän da dıldı, konfert gösterildi hem “Gagauz Ata sözləri” kiyadın tanıtımı yapıldı.

“Ukrayna gagauzların kultura günü” sırasına katıldılar devlet adamnarı, büükelçilär, Ukrayanada hem Türkiyedä yaşayan gagauzlar hem krım tatarları, kultura insanları.



Hepsi karıştı: insannıkan insannık, “Enseyiş Günü”nän “Evropa Günü”, Kızıl Askeri hem NATO

(Sonu. Çeketmesi 1-ci sayfada)

Hederlez ayın 9-da, sabaalen, Moldova Prezidentı Maya SANDU, Moldova Parlamentın spikeri İgor GROSU hem Evropa bütet hem administratıyalık komisarı Johannes HAHN, II-ci dünnä cengindä ölä askrlerin anması için Kişinev “Sonsuzluk” (“Eternitate”) Memorial Kompleksında düzennän sırada pay aldılar hem burada yanan “Sonsuz ateş” yanına çiçek koydular. Bununan Moldova öndercilerinin II-ci dünnä cengindä Enseyiş Günü bakması bitti da çeketti “Evropa Günü”n tantanalı bakılması.

“Evropa Günü”n kutlamasının açılışını yaparak, Moldova Prezidentı Maya SANDU kendi sözündä urguladı: “Moldova Respublikası Evropa Birliini seçer, çünkü barış – bizim öncülüümüz!”

Açılış sırasından sora, Prezident Maya SANDU, Moldova Parlamentın spikeri İgor GROSU, Evropa bütet hem administratıyalık komisarı Johannes HAHN hem başka politikacılar, meydanda “Evropa kasabası” çadırlarını gezdiler.

Evropa diplomatlık temsilcilerin çadırlarından kaarä, meydanda türlü şenniklär hem sergilär vardı.

Onnarın arasında, bizä görä, pek meraklı biriydi – NATO silählärin hem askerlerin sergisi. Halizdän – “Si vis pacem, para bellum”: isteersin barış, hazırlan cengä.

Taa sora, Maya SANDU verdi Evropa bütet hem administratıyalık komisarına Johannes HAHN Moldova Respublikasının “Ordinul de Onoare” ordenını. Bu arada Kişinevdä, Gagauziyada, Belş hem taa başka kasabalarda II-ci dünnä cengindä “Enseyiş Günü”n kutlaması insannar arasında ilerlärdi.

Kişinevdä, sabaalen merkez meydanından “Sonsuzluk” (“Eternitate”) Memorial Kompleksına yollanan insan dolusu kolonna erinä etişiydi hem burada veterannarı kutlamaylan raametlilerä saygı sıraları gidärdilär.

Kişinevdä “Hepsimizä bir enseyiş” avtoprobegi yapıldı, angısında pay aldılar üzdän zeedä maşına hem bindän zeedä insan. Bundan kaarä “Ölümsüz polk” öryüşü oldu.

Gagauziyanın kasabalarında hem küylerin çoyunda Kurtarıcı-asgerlerin memoriallarına hem pamätniklerine çiçeklär hem venoklar koyuldu, say-



gı sıraları yapıldı, teatrulu gösterilär hem konfertlär düzennendi.

Bakmadaan ona, ani Hederlez ayın 9-da Moldovada hepsi karıştı: insannıkan insannık, “Enseyiş Günü”nän “Evropa Günü”, Kızıl Askeri hem NATO, o gün haliz yortulu oldu hepsinä, kim unutmadı geçmişi hem geleceä umutlan bakër.



“ANA SÖZÜ” Gagauz dilindä gazeta
Çıkâr 14.08.1988 beeri

Kurucu “ANA SÖZÜ” S.R.L.
Sertifikat No. 1003600086420

Todur ZANET
Baş redaktor

İndeksi - PM – 21358

Gazeta “Universul” basım evindä basilär
Tiraj – 3020 ekz. Sımarlamak No: 511

YAZIŞMA ADRESİMİZ:
RM – 2028, Moldova, Kişineu,
c/p Nr. 1025. Tel/fax: 022 28-18-04

e-mail: todur.zanet@gmail.com
zanet@anasozu.com